



SHOBANA (tengah) menerima replika cek daripada Pengarah Urusan Shell Malaysia, Shairan Huzani Husain (empat dari kiri) di Shah Alam, Selangor baru-baru ini.

Shell kumpul dana untuk NKF

AYASAN Buah Pinggang Kebangsaan Malaysia (NKF) telah berjaya mengumpul dana sebanyak RM428,388 sempena kempen derma raya yang dianjurkan oleh stesen minyak Shell di sekitar Selangor, Negeri Sembilan dan Kuala Lumpur.

Kempen yang dikenali sebagai *Anda Pam, Kami Derma* itu merupakan salah satu inisiatif Shell Malaysia bagi berkongsi kegembiraan sepanjang musim balik kampung lalu.

Sepanjang kempen berkenaan, sebanyak 315 buah stesen Shell telah menderma 1 sen kepada NKF bagi setiap seliter minyak yang diisi.

Ketua Pengumpul Dana, Pemasaran dan Komunikasi NKF, Datin S. Shobana berkata, pihaknya sangat teruja dapat menjadi sebahagian daripada kempen tersebut pada tahun ini.

"Kami sangat menghargai dan terhutang budi kepada stesen minyak Shell yang mengambil bahagian dalam kempen derma ini.

"Kami harap wang tunai hasil derma ini dapat mengurangkan beban yang

ditanggung oleh pesakit sekali gus meningkatkan kualiti hidup mereka," katanya dalam satu kenyataan akhbar baru-baru ini.

Ketika ini, terdapat lebih 50,000 pesakit memerlukan rawatan dialisis di negara ini dengan 7,000 pesakit baharu setiap tahun.

Dua kali ganda

Menjelang tahun 2040, jumlah pesakit akan bertambah sebanyak dua kali ganda sekali gus menjadikan Malaysia sebagai negara yang memiliki pesakit buah pinggang ketiga tertinggi di dunia.

Pengurus Jualan Shell Malaysia, Zharin Zhafrael berkata, kempen tersebut telah memasuki tahun kedua yang melibatkan stesen minyak Shell di Selangor dan Kuala Lumpur.

Jelasnya, pihak Shell meluaskan program tanggungjawab sosial tersebut ke stesen-stesen minyak Shell sekitar Negeri Sembilan pada tahun ini.

"Ia satu pencapaian hebat dapat mengumpulkan derma yang agak banyak dalam

tempoh enam hari. Harapan saya, ia dapat diteruskan pada tahun-tahun akan datang.

"Kami juga harap kempen seperti ini dapat meningkatkan kesedaran orang ramai terdapat masalah buah pinggang," jelasnya.

Zharin menambah, pihaknya juga sangat gembira dapat mengembalikan senyuman pada wajah pesakit dan keluarga yang terpaksa menjalani rawatan dialisis.

Katanya, sumbangan tersebut sedikit sebanyak dapat membantu meringankan beban pesakit buah pinggang yang kurang bernasib baik.

Hasil kutipan akan digunakan oleh NKF bagi menanggung kos dialisis pesakit dan membeli mesin dialisis baharu bagi pusat NKF baharu di Seremban, Negeri Sembilan.

NKF mempunyai lebih 1,700 orang pesakit yang menerima subsidi dalam bentuk rawatan dialisis di 28 buah pusat dialisis di seluruh negara.

Maklumat lanjut atau sumbangan kepada NKF boleh dilakukan menerusi laman web, <http://nkf.org.my> atau hubungi talian 03-7954 9048.